

Bosfontein: 8-10 Maart

Ons kon nie wag om Vrydag baie vroeg in die pad te val nie omdat die kamp vir my 'n eerste was. Maar hoe groot was die ontnugtering toe Margriet skakel en ons die nuus meedeel dat ons nie voor tweeuur die middag sou toegelaat word om die kamp binne te gaan nie. Ons het toe maar stadig aangestoot na Bela-Bela om daar 'n middagete te gaan nuttig. Na ete het ons toe besluit om maar aan te ry en dan daar te gaan wag. Groot was ons verbasing toe ons so teen eenuur daar aankom en 'n hele paar woonwaens reeds sien wat al 'n geruime tyd klaar opgeslaan staan.

Nietemin was daar dadelik helpers by om ons woonwa reg te stoot en afdak op te slaan. Na Vrydagaand se Boekvat het ons heerlik weggeval aan worsbrode (die wors was buitengewoon smaaklik en van 'n baie goeie gehalte), en daar is heerlik onder mekaar gekuier tot laat die aand.

Saterdag het ons ook maar gebruik om lekker onder mekaar te kuier en te klets (natuurlik die dames). Die jeug (en die nie-meer-jeug) het baldadig in die swembad baljaar. Net nadat ons die vuur aan die brand gekry het, het daar n heerlik reëntjie geval, maar afgesien daarvan het ons almal tog lekker saam gebraai. Daar was ook lekker roomys deur die jeug verkoop en die groot mense het hulle omtrent daaraan vergryp. Sondag het ons, soos ons gewoonte is 'n Boodskap aangebied deur Wayne Botha. Wayne het op sy eie 'n baie treffende boodskap vir ons gebring. Daarna het ons afgesluit met 'n lekker drinkding en die nodige soetgoed in die vorm van koek en lekkernye. Opslaan om terug te ry was weereens maar traag.

Ben van Eeden



Ben en Alta van Eeden het reggestaan as kampkommandante met die hulp van Tinus en Tersia Fourie. Wayne Botha (heel links) oorhandig aan hul die kampkommandanteplaatjies

Swem en speel....



Eet ...





Slaap...



Besoekers word
verwelkom!



Wayne Botha verwelkom die besoekers vir
die naweek, bo is Willem en Leona en links
onder is Jandes en Betrus